

# KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Santaneaksat ke 2022

1<sup>e</sup> otuk

Kotava, tela tamefa golerava  
Va ina kosmac !!







# IZVA IS ARAYA

## Choquequirao ~ Inca widaki koe Perua

### Tumtakrant ke Inca sane

Choquequirao ( vey chuqi [ moava ] kitcuavaxa isu k'iraw [ kova ], trabe moavakoava ) tir rawaxo ke Inca widava tigisa wale sekol ke Salcantay jaka, koe Santa Teresa utca ke Cuzco winka vagee Perua.



Tadle ke rawo-pafa cugexa ke Choquequirao tir vas yone xe isu tawetc isu azekos vegemon tigis moe konaka vwa, male Sunch'u Pata lodomafa vwa kale an ontinuk vwayan az anammadayan gu raporki num

vanpiyis azekos welmaf gu mon 1500 m<sup>2</sup>.

Choquequirao wetce « tumtafa berikya » ke Machu Picchu nope drefa is vegeduropafa oltavuca zo gruper.

### Debala

Choquequirao manekon ice 13° 32' G- is 72° 44' tigur. Ontine tir vas 3030 m- moe sekol ke Salcantay jaka tice Apurimac kuksa, koe Cuzco winka.

Anameda ke Choquequirao tir tana lokulafa gu bligedruca. Kota katca blisa koe vema gu

arapeniwesa gropa nope ontine is yanka ( tulon awaltara afizon is tapara mielon ) va int al zaled. Lizukaf fled tir dem nelkon pukey is wocukol is wiftol is bresitol is mamfol is wasol is rupol is proklavu (Rupicola peruvianus) tisu vedeyafi zveri ke Perua. Ke ruxeem, gulafa rucka is jontika biarlinda solwikad.

### Vansara


Reugale sidafa vawa tir antafa rotisa joya kal Choquequirao widaki. Logrupena vawa tir wixayana vawa ke Cuzco-Urubamba-Ollantaytambo-Huayopata-Santa Maria (200 km-).

### Inca rekola ( 1438-1534 )

Choquequirao tiyir arayaf is alkaf debak mu vema. Rolevaykat da bati widaki va stujexo ta vansara va Vilcabamba gabot is aryon zolonaf lizuk dum Pisac is Machu Picchu zanudayar. Dere trakut da widaki va gluya wal Amazonas aalxo is Cuzco gindafa widava yordapayar.

### Zeviandasa rekola ( 1534-1572 )

Choquequirao gu tana ironokafa lipta acagisa is gelbesa ke Inca saneik zo torigir. Benpleku-



## Kotavaf Izvugalayak [-1000 – -800 : Amerika]

*Sinka is Anameda — Irubara is Vegedura — Ckane is Gandura — Yamba is Miga*

### XOT IS SARIALA

Solve toabaneyestasa sanelia vegetalte Lentefa Amerika laumad, va xot is amidafa sarialinda toz miduyud. Mukotara me tiyir warzera va sinka vas logijafa tokoda voxo va loon belaf rob gotumusayar.



Xot is sariala. New Mexico

### ALKAXO

San Lorenzo, i taneafu Olmeca kelu, vilayana gan geja bak -X-eafa decemda di jovleyer. Warzafu kelu koe La Venta di zo exoneyer, koe wedafa gola vagee Mexika. Vegedura va alkaxo moni -900 zo bokayar. Istefe dre tiyir feykoraf tawarn ontinaf gu 30 m-, rotir divrozase va tculk. Konaka ctakafa burgifa balumayana taka koeon zo kosmayad.

Alkaxo, La Venta, Mexika







yumbon gan Manco Inca, irubasik is gejik va Cuzco al buluyud aze koe gola ke Vilcabamba

ba al gelbeyed viele bak 1535 Cuzco gan espanik zo vandeblameyer. To batlize is koe kotaf Vilcabamba krant Manco is bocaf melevrotinik va ruzadera ke espanik acagiyid, kali gralomera va Tupac Amaru azu klibura bak 1572.

### Vuestexa bak boniaxofa rekola

Juan Arias Díaz Topete espanik bak 1710 tiyir taneaf vestasik deas va giva icde lani widaki yoltkirafi gu « Chuquiquirau ». Taneafa suteyena vuestexa va Choquequirao tir evlafa gu 1768 gan Cosme Bueno. Bak 1790 Pablo José Origaín va widava bassaneliayana mali lekeugal is yoltkirafa gu Choquequirau koe « Compendio de Noticias Geográficas del Cuzco » suteks miwar.



### Warzafa kosmara aze dimempara

Bak 1834 José María Tejada winkokilik ke Cuzco va widaki artlakir, sumpanon gan vunda icde jwa ke Vilcabamba. Dere bak 1837 Léonce Angrand va xo taneatomon liwotar voxen inyon liwot di zo vulkuyud.

Oxam to bak 1909 viele Hiram Bingham amerikaf rawopik is Clarence Hay welmasabesik va Choquequirao worayad, pune widaki gan rawopik is peruafe bowere loeke di zo dulapeyer. Soe taneafa kojoxara moni 1970 oxam bokayad. Bak 1986 noalafa vayara az azed ta dimempara va debak zo skuyud.

Re uldinet da ant 30% ke birtey vas kotote 1810 decemiray tid koafizayan ise ta koyarulafa tegira zo saved. Tenukera va dimempara va konaka tanda fu olegar.

*Nuyafa ewava male internetxo :  
<https://commons.wikimedia.org>*

### Pimtara

Choquequirao birtey tir dem lerdoy seg. Gaderopaf alkaf av is bolk ke suleem is narilteem dem lavanarilt is tuvelieem solwikad.



### Tawovopa

Wison mal rid ok lana soluma, va ordaf azekos ponas va logijaf veveduks ke Choquequirao fakon rosolwit. Dopewa is konake ristulafe xe is yona mawa mu ristusik is nelkaf pirdasik aname nelkafa boga tigiyyid.



Internetxo : **Kotava** : langue, littérature / ava, suteroteem

<https://kotava1837481.wordpress.com/2018/11/12/izvugalayak-1000-800-amerika/>

#### TROCADAYAF KUECA

Koe yona naboxa ke Tlatilco, i koe tana taneafa wida ke istexo ke Mexiko, akintakorafa kueca kum trocaday is koingasiki zo trasiyyid. Sinafa tigira is tela ke yona elzawa isu flek isu ingaxa bazed da awalkik tiyyid ke ontinafa pula. Jontik fum tid ke Olmeca martig, nope moortera wal bata toloya araya.



Kueca, Tlatilco, Mexiko



Trocadayaf trig ke Chorrera, Manabi, Ekuadora

#### MARTIGAYANA TAWOLDA

Trocadayaf trig ton martig ke Chorrera ( vey yolt ke debak ke Ekuadora ) koe valentexo ke Geefa Amerika manton zo amuzeyed. Tazuk ke bat ronef trig, dem rontaf krileem is azekaf ludev, tir ke isteamerikaf martig. Darkasaberopaf gretcaks va Olmeka fum dere kimbad nume tiaved da skedara wal Istefa Amerika isu Geefa lekeon ixam kruldeyed.





## TANEAF DOV

### I : Tazukinda



Darekeon, decitdon abdi tuseltayasa wicapa lizu Ninuwa az Babilim az Agmatana kaikion gepoyteted.

Pcexu alizmonaf grelt, do intaf astoleem isu okoleem isu bonoleem, va Ksur volokafo aalxo, moni titawaltara, koe ploda dem dadafa olya, remlanir. Nomdank adeer, azenter, va yona tamafa begama ticustir.

Kottan tir legapaf nume guamlitar, aneyason va sentanya lize grelt va baerdaf tey rovanteyatar aze va sielestura rotegatar aze bravon ice ficik kadime jontolaf stirk ke keraf reliezak rokenibeter.

Rujod tumulkukawed, bidgasa coyunta van zideem lutced, mielaf lorik va kovdas dank suked, voxe grelt wan lanir. Abdurubasik tcepason dimlakir, dakteson va senta is lava, va karafa klita.

Grelt baron kizoyupur ; kottan loon kalion abdulnir, rumeafa kipera malstid ; dace kot okol isu astol,

Senta awir. Mempesa klita va tij is luca gu intafa kelda fer. Tacukaca pu alizmonikeem va int nedir.

Taneon, ivamupu dem faltamaf is remafif fey dis va ticon uul, krotc ke kot fey tis vas mon lik ke ayik. Konake aftafe tride is konaka orikafa tiora va sinafa welma ciaed ; omava ke kot fey va jebes bitej nedir.

Kaikeon, bada, lion divulafa, xuon madawed, oltavackafa gu almuk ke cirdata is umicakirafa gu jonksefaf fralek. Dere tigid, batlize ik banlize, riwe akintafa tazukinda, ison gedrapafa, lanyona tigafa is ontinafa, aryona omafa is alnafa, kota iyekotukafa is vrafukirafa gu kuse, kota disa va adalafu afiu, dum bada.

Grelt woltendan kaldisuker. Broyesa kivara va telyon budik titicker, i wan laumasa viele tazukinda vanmiaie lukoptafa izga ke senta toz dzavewed. Aze levgon, bitej skotced ise darunted, fey tuabrotcawed, akinta is bada dum lava mimana mo teyka lorad, kotcoba va alizmonikeem kaliapon vannir.

Grelt, kodiwan gan bata disukexa, me zekar, wan disuker. Tazukinda domud. Gla tir mayakafa. Gejikye is ayikya is rumeik, milinde gan xango ke gleba bulon zo co-tazed, mo sid ke aalxo zulzulon atitsud. Bam, ozgodafa eaftuca va po is wilteem ta tuzafa yatera pu moblisikeem dimzilir. Nume tazukinda, taneon flavakorafa is emon vuyuna, va sint anam grelt tcastad, volsaason ebiduson va kot otcetik. Kulafa dilfura, wori, me tir gojupekasa : va konaktan atar, va konak artan spikonar, meviele bakar. Konaka kerafa belaxa mal pezolk ke yon ilblisik iku ita iku oblaka bimiled, vexe kotar ayik, dokotaf, fure mangir aze tacukon gin vultar, koe nomafa



Nekev intafa merogotuna tuwava, dum tisik vols ra, tazukinda tegid kire, dum tisik, tid voltaniafa is gedrafa gu nira, tire narason va intyon kosik is megojeson va alizmonik gu ruxa ok dace sulem.

Fure tel lokaliaf ayik pestaled da mea zo onkad. Cuerses is sollipayan, van zultaca adim roverwoded. Ileon wale izgan ulim, draydesa onkara wan dilizer. Ise tazukinda va gejik lodamon tcabaned aze staked voxe va axik ik ayikya ik rumeik loviele ikudad.

Batinde, iluon, koe varaf miel, nakila tir voltuwavafa, loon selusa va kota bartafa kerava. Gejik gire fu yated. Vexe aldafa dizvera azavzar : lecen, va bet otcetik, kaike titickafa kima tazukinda ten onkad. Nume, nek legaf, nek povwaf, nek krezezes, kosik zo isker batvielu bata rietavafa jowa zo zomer, nume beta iyela kaiketon vukir.

Bata karavaldasa katcalara, fure gruyena gan alub-sanoya bifa, va bolaf nogleem ke kot otcetik tuaular. Sin va dositik divvawayas va stakera isu ayikya isu kimtaf ayoc roveked. Ison, lantan, sinaf gradilik, taneon tuficayan is ciwayan gan volaye ke stuva, va gandira ke intafa glogapa dimdir, va teyxo anteyar, ta nyapera va otcetik ayadolnolur.

Bam, tantanon, kimtik artlanid. Jontik, minkedaf, moe nubeem va int impadimad. Nazbeakirafa ayikya, kan merosekiano gadikyaf po, va intafa enga rem ciwan rand al sud ise al kabelcad ise al bured. Aze jontik astol isu okol isu jaftol, tuoviskan leon dam ayik, dimawid.

Grenyaf mielcek, tiskin koe amlit, mekenibes, lize gejik va skotcera ke intaf putceem trenon pestaled. Vexe toz afizar, zwon rem toeemap, aze vanawaltafa lexa dem kseva is taulesisi zveri artstir ise koldar enide kottan di blir ise va eaftaceem ke mielak aloyar.

Gradilik, i tuwavaf okilik, lospalospason belcason va tari, va grelt toz patar. Lik ke gejikeem, tol-decemoy va rozara graced. Drasura va yona ayikya tir loon abica ise tela va rumeik tir vuga.

Arti bata otulara, viele rembures bonol al zo kabelcad ( jontik graced, yoke vamoeuca ke wayeda kapbure ova bak kota otcera ), Gradilik va grelt kare gubefa vura deraykar, aze, benplekuson da kottan ker, antaf is zwaf va senta vanlanir. Metan, dace ileon, roveradimlanir.

In vanlanir liz aal leote tigid, aze va kima darevielon dizveyena kaiklanimir nume disuker.

Sumeon, koe fedafa remawisuca ke gazda, listafa klita traspur ; moe domegeem, belcaf tacukaf milk dem tazukinda drayder. Sinafa kseva al arapeniwer. Fey tid loon elkaf, sinafa frolgukafa bia al tukusawer ; akinta kadulon aotcewed ise bada va ketaf lut vektad. Vexe olya ke bitej va kota tazukinda kostid, i baalpesa dace reme afizafi afi. [...]

**Xipehuz tisik**, ke J.-H. Rosny Aîné ( 1<sup>-eafa</sup> zixa ; wana titisa koe diref otuk )

Xipehuz tisik, gestaropaf berpotam (1887) ke J.-H. Rosny Aîné belgaf suterotik  
Xanto : *Les Xipéhuz*, francavon, kalkotavayano gan Damien Etcheverry, 2014.  
Dotay : Kotavaxak dem Suterot.

Robelin banliz : <https://fr.scribd.com/document/202479811/Xipehuz-tisik-ke-J-H-Rosny-Aine>




**Johannes Vermeer ( 1632-1675 ) ~ Nederlandaf lingsik**

Johannes Vermeer ( okon Jan Vermeer ) tir sposapaf nederlandaf lingsik.

**Blirizva**

Johannes Vermeer bak 1632 vey dolekafa yasa koblr. Gadikye tir gelfalaysik neke jonebur. Lanedje dace tir yoridik ise va kazafa katectara ke bat sok impavantar nume dere tir yambadolekik. Konak valdig ke Sint Lucas gesia slamed da va konaka trutca ke yon lizukaf lingsik doleyer. Voxe me tir deksaf kazik numen ba inafa awalkera bak 1652 Johannes va bozapa konoler.



Valey bata uzerara gu yambikeem, yambafa ravera ke jotaf Vermeer teni 1640<sup>e</sup> sanda ape tozuwer. Ant sazdera novel da va inyon feliik en tis ke lingsikeem ke Delft rodasugdat. Batdume va Carel Fabritius ( 1622-1654 ) ik Leonard Bramer ( 1596-1674 ) ik Gerard ter Borch ( 1617-1681 ) ik Evert Van Aelst ( 1602-1657 ) tulong divrozat. Areldon, teni 1653 Johannes Vermeer gan Sint Lucas Gesia ke Delft zo tufeliar. Acum banugale gu konaka raveyena tanda roslameyer.



Bak 1653 va Catharina Bolnes kureyer, i va katalikevik. Bantan tiyir vey erbakirafa yasa ebakirafa gu norkakaza. Voxen Vermeer tiyir Calvin alkevik numen seotatason va pliera ke Maria Thins ikagadikya va katalikeva godewelduyur. Bata deweldura, purafa ok me, va toloya jotugalafa trutca soe nekiyir : Krist koe mona ke Marta is Maria ( 1654-1656 ) is Praxedes Tumtikya ( 1655 ). Bata kurera di noveyer da Vermeer lanedje di triguyur. Jotafa tolona dene Maria Thins inkeweyer. Sanaluboy nazbeik veyon di kobliyid.

Milugalon gu lingesa kubla, Vermeer va ebafa parloera va trutca ke gadikye wanur. Va sposucanya kourlicker larde bak 1662 wetce grosibik ke Sint Lucas Gesia ke Delft zo libur, trabe gadesik va dreema dem lizukaf yambikeem. Jafasik pu lingsik tid strabik ke widava ok vema isen inafa sposuca va winkajoweem me artfiyir.

Gaderopafa is skapafa debal ke Nederlanda bak 1672 ligundewer. Patecta belcon tir jala ke francafa ervolia ke Louis XIV ( Xollanda geja ) is englaf biratoteem. Ta konendara va Amsterdam tove volnik, siday leve bireka zo molavad. Astirbafa skapadeona nopeon tir numen yambafa dolebela di urdar. Maria Thins veygadikya va ziliduks loote drasur. Osk lingsik mea mbi jafar voxosk tegira va trutcakaza titaytcur. Ta sinkara va yasapa, Vermeer va decitoy gulden taltolk gonerbabeitur. Erbiskaf num bozakirapaf is burdackaf, i yambanyik kalion tuaxawer. Ba san-toleaksat ke 1675 koe Delft di awalker. Dimerbatason va boza vas 1000 [...]





## Mallanixo : Nihonbashi

Mallanixo : Nihonbashi tir taneafa gweta ke sposaf gwetak vergumveltkiraf gu 53 recela ke Tōkaidō vawa ( Tōkaidō Gojūsan-tsugi no uchi ), zovdayan gan Utagawa Hiroshige niponaf yambik, is taneon piskuyun bak 1833-1834 gan Hōeidō.

Tōkaidō vawa tiyir vawapa wale Edo ( re Tokyo ) tiso kelu ke Shogun patectokilik is Kyoto gindafu kelu ke Nipona. Sareon gu Hiroshige, kotafa soluma tiyir vas mon 500 km- numen lanis koyasik bad mon toloya safta exuleyed.

Hiroshige va varaf gwetak dem 53 recela ke zalor zovdayar. Bata gweta ( Ukiyo-e tazuk ) tir lumkirafa gu 37 × 25 cm- ( Oban breviz ). Tir taneafa ke enk ise va mallanixo mal Nihonbashi za koe Edo kaatoer.

### Nihonbashi za

Nihonbashi za tir mallanixo ke Tōkaidō vawa is dere balemoya ara vawa, i ke belca tazukasa va Gokaido gort ( Aluboya vawapa ke Nipona ). Soluma male bata uta zo patavackayad.

Koe Muromachi gola, poka Kitazume is Odawara, dolexo va kabay tiyid jontiko. Tite Nihonbashi za to batlize koyara tozuwer. Vanawalton, moni 7-eaf bartiv, teixa mo Tōkaidō vawa talton mallanir.

Teixa vas tanoy jiomik is kabdueon toloy zanisik bures va fiptabozak az yonar zanisik bures va prolk ruldar. Talteon avlemodaf kabaydolesik va daremielaf kabay vanbured isen aryon dem tuvlardayana kita dimlanid. Roneon toloy vakol va koni jovleyeni sinkaki rotir kaaneyad.

To mana spua male bata taneafa gweta diveksoyewer eke ina jontikote vere zo doleyer numen piskusik va warzafa gretcaxa di goniayar. Hiroshige bam impavantayar nume va konakar koredik lopekuyur. [...]



*Utagawa Hiroshige lingsik  
( 1797-1858 )*



*Xantofa piskura : 1833-1834 gan Hōeidō*



*Piskura : Gyosho enk, 1841-1844 gan Ezaki*



*Piskura : Reisho enk, 1847-1852 gan Marusei*

*Varaf teliz tigis koe Kotava Xadola dene Wikipedia.*

*~ Banliz : [https://avk.wikipedia.org/wiki/Recela\\_0\\_-\\_Nihonbashi\\_\(gweta\)](https://avk.wikipedia.org/wiki/Recela_0_-_Nihonbashi_(gweta))*



## TELIZ

2<sup>e</sup> bu : Choquequirao, Inca widaki  
2<sup>e</sup> bu : Kotavaf Izvugalayak  
4<sup>e</sup> bu : Xipheuz tisik, berpotam  
6<sup>e</sup> bu : Johannes Vermeer, lingesik  
7<sup>e</sup> bu : Mallanixo : Nihonbashi  
8<sup>e</sup> bu : Liwombura  
8<sup>e</sup> bu : Kuda ke Aisopos

## Kotavusa virda

Virda kotavon sanelayana, nuyon is faston  
romalvajana is rorubiana is rotamzilina.  
Ickriluyun rokeem. PAG / DE.  
Internetxo : [www.europalingua.eu/KotavusaVirda](http://www.europalingua.eu/KotavusaVirda)  
Bu : [www.europalingua.eu/KotavusaVirda/1-e\\_otuk\\_12-2022](http://www.europalingua.eu/KotavusaVirda/1-e_otuk_12-2022)  
Sanegara : Santaneaksat ke 2022. 1<sup>e</sup> otuk.

## LIWOMBURA

Tula va liwa ke lana ombaliwa watson gu alto.  
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/09/02/un-jeu-de-7-familles-en-kotava-2/>

6

Loma  
AAL / RUXA

ALTO

FR  
fruit(s)

**Enga / engeem**



*Kontan kazawas va "Enga" liwa bas ar  
ombusik, va tenturama volunt gokalir.  
Djay...!!*

zae - ulim - gama - toa - imwa - enga

## Okol is jaftol is vakol is ayik

Viele Zeus va ayik reduyur, va krulderama anton doziliyir. Voxen ayik, malfaveson va grucca, va mona miv vededuyur aze koeon sokeyer. Volsen, lanvielon, fent al tutizaweyer ise toz muvayar ; okol mezavzagis va ayik vanvulteyer aze eruyur da di zo bravayar. Voxen ayik dakteyer da anton kredeon di askiyir : okol va konaka intafa titisa tanda di co goziliyir. Okol balte kserayar. Vanion, jaftol va int dere atoeyer : jaftol va sazaj dere me tabiyir. Ayik milinde dulzeyer da me di co kazawayar vaxede va konaka inafa tanda mbi di co ziliyir ; jaftol va pak ziliyir nume zo dosteyer. Tere, vakol fentawalkes dere artlaniyir, nume xaadason va pak ke intaf titis ugal, va brava seotayar. Batse daneks : viele ayik va ugal doziliyin gan Zeus kotaskir, pune sotir karaf is vonaf ; viele va Okol ilanacek artfir : sotir aliaf is calgaf ; viele va Jaftol ilanacek kofir : sodjukudirgar ; viele arti blira, bak Vakol ilanacek, sovanpir zidesik is buusik.

[Bata kuda gu zidaf is wareskaf guazik zo co rewar.](#)

Kuda ke Aisopos, -VI<sup>eafa</sup> decemda  
( kalkotavaks gan Yurani Andergan )